

欽
定
全
唐
文

欽定全唐文卷三十八目錄

元宗

十九

停潁王等節度誥

降永王璘爲庶人誥

贈張九齡司徒誥

令郡縣采奏孝弟誥

冊元獻楊太后誥

答皇帝讓尊號誥

答皇帝上尊號誥

再答皇帝上尊號詔

答皇帝上尊號并讓大聖字詔

答皇帝三上尊號并辭大聖字詔

賜皇帝進燒丹竈詔

答皇帝表謝宣示進丹竈詔

遺詔

受禪告南郊文

聖祖大道元元皇帝加號冊文

高祖神堯大聖皇帝加諡冊文

太宗文武大聖皇帝加謚冊文

高宗天皇大聖皇帝加謚冊文

中宗孝和大聖皇帝加謚冊文

睿宗元真大聖皇帝加謚冊文

光天文武大聖孝感皇帝加號冊文

冊謚殤皇帝文

冊謚讓皇帝文

冊郢王爲皇太子文

冊惠莊太子文

冊惠文太子文

冊忠王爲皇太子文

冊交河公主文

冊建平公主文

冊臨晉公主文

冊眞陽公主文

冊興信公主文

冊樂成公主文

冊壽光公主文

冊平昌公主文

冊廣寧公主文

追冊讓皇帝故妃元氏爲皇后文

冊壽王楊妃文

冊榮王鄭妃文

冊永王侯莫陳妃文

冊榮王薛妃文

冊濟王崔妃文

冊信王盧妃文

冊陳王韋妃文

冊壽王韋妃文

冊廣平郡王崔妃文

冊涼王張妃文

冊東海神爲廣德王文

欽定全唐文卷三十八

元宗 十九

停潁王等節度誥

鑒門命將授鉞專征仗以方面之威執夫賞罰之柄邦家重任固實在茲潁王永王豐王等朕之諸子早承訓誨琢磨詩書之教佩服仁義之方樂善無厭好學不倦頃之委任咸緝方隅今者皇帝即位親統師旅兵權大略宜有統承庶若振綱惟精惟一潁王以下節度使並停其諸道先有節度等副使並令知事仍並取皇帝處分李峴未到江

陵永王且莫離使待交付兵馬了永王豐王赴皇帝行在
降永王璘爲庶人誥

臣子之節君親是奉或志懷千紀當義在滅私蓋前王所
以持法割恩垂涕行戮言念及此歎息彌深頃以凶孽亂
常關畿暫阻朕乘輿南幸遵古公避狄之仁皇帝受命北
征興少康復夏之績猶以藩翰所寄非親莫可永王璘謂
能堪事令鎮江陵庶其克保維城有裨王室而乃棄分符
之任專用鉞之威擅越淮海公行暴亂違君父之命旣自
貽殃走蠻貊之邦欲何逃罪據其凶悖理合誅夷尚以骨

肉之間有所未忍皇帝誠深孝友表請哀矜雖解綬全體
禮可行於曩制而削土勿王義亦著於前史昔廣川有罪
因廢爲人常山免誅爰將徙地是用矜其萬死屈此九刑
宜寬伏鎖之命俾黜析珪之典可悉除爵土降爲庶人仍
於房陵郡安置所由郡縣勿許東西朕存訓誘勗之忠孝
不虞孱懦遂至昏迷申此典章彌增媿嘆

贈張九齡司徒誥

正大厦者柱石之力昌帝業者輔相之臣生則保其榮名
歿乃稱其盛德飾終未允於人望加贈實存乎國章故中

書令張九齡維嶽降神濟川作相開元之際寅亮成功讜
言定於社稷先覺合於著龜永懷賢弼可謂大臣竹帛猶
存樵蘇必禁荊州之贈相府未崇爰從八命之秩更進三
台之位可贈司徒仍遣令使就韶州致祭者

令郡縣采奏孝弟誥

至和育物大孝安親古之哲王必由斯道朕往在春宮嘗
事先后問安靡闕視膳無違及同氣天倫聯華棣萼居嘗
共被食必分甘今皇帝奉而行之未嘗失墮每有銜命而
來戒途將發必肅恭拜跪涕泗漣漣左右侍臣罔不感動

間者抱戴赤雀白狼之瑞接武薦臻此皆皇帝聖敬之符
孝友之感也故能誕敷德教橫於四海信可以光宅寰宇
永綏黎元者哉其天下有至孝友弟行著鄉閭堪旌表者
郡縣長官採聽聞奏庶孝子順孫沐於元化也

冊元獻楊太后誥

聖人垂範是推顧復之恩王者建極抑有追尊之禮蓋母
以子貴德以謚尊故妃宏農楊氏特稟坤靈久釐陰教往
以續塗山之慶降華渚之祥誕發異圖載光帝業而冊命
猶闕幽靈尚閟夏王繼統方軫陽城之恩漢后褒榮庶協

昭靈之稱宜於彼追冊爲元獻太后

答皇帝讓尊號誥

昊穹垂佑宗社發祥爾往在髫年素彰岐嶷洎乎問寢日
增孝敬吾久勤庶務常奉至真特好清虛尋將付託爾以
華戎銳士掃定神州功乃格天德惟邁古是用受茲國寶
加以大號典章斯集喜慰盈懷實謂道應前王何以志在
讓禮克光丕業以副至公即斷來表

答皇帝上尊號誥

汝孝以奉親明以御宇上從君父之命下順黎元之欲旣

宏茂寔爰副崇名千古攸高百王是式載循章奏喜慰可知予志每集虛心嘗遺炤方契真宗之旨豈云稱號之榮汝就養無違歸尊有裕載獻從龜之吉復當乙巳之辰已備典章當依來請

再答皇帝上尊號誥

三朝問禮五讓丕圖用殷后之師載戡牧野同周王之步來入鎬京美暎縑紉功侔造化命之守器加以鴻名掃厄運而有融當樂推而難拒予棲神道要養志真元邦家乂寧自多愉悅

答皇帝上尊號並讓大聖字誥

天地肇啟皇王聿興故三王垂御圖之迹典墳著牧人之
要爰立邦家其來尚矣予承百王之遐運繼五聖之不業
亭育區宇寵綏蠻夷罔不率從多厯年紀頃者姦臣煽禍
中原構釁汝睿略懸於兩曜鴻勲格於九天終古莫儔上
天是賴故加之大聖建以崇名用膺多福何所與讓予夙
達元妙遠寄真宰凝神澹泊足可自怡至於宗廟陵原常
展慶矣郊禋豫動固陳儀焉方期仙於上境已遺榮於中
域汝欲歸尊於父實在因心爰及朝臣亦同懇願且無爲

於沖漠又何取於徽名宜悉此懷用全至道耳矣

答皇帝三上尊號並辭大聖字誥

道高者必傳其迹德著者必享其名汝廓淨妖氛載安社稷萬靈式敘豈非大乎兩儀交泰豈非聖乎吾所以親受寶符自題徽號寧惟對於列辟諒已聞於率土渙汗之出理不可收絲言之行事必有在將固撝謙之道是違億兆之情天地神祇未以爲當宜膺景命即斷來章

賜皇帝進燒丹竈誥

孝感之極通於神明傳於前史迹罕彰灼今日之事不其

效歟吾比年服藥物比爲金竈煮煉石英自經寇戎失其
器用前日晚際思欲修營一昨早朝遽聞進奉有同符契
若合神明此乃汝之因心測吾之本意豈惟此度前後非
一則知惟睿作聖惟德動天再闢寰宇重會父子付託之
際古今未聞色養之勤書冊不載寤寐嘉歎深慰於懷宜
頒示天下宣付史館

答皇帝表謝宣示進丹竈誥

王者域中之尊孝者天下之本兼而成務厚莫重焉而應
物以和奉親以愛由衷而舉有感必通若不動於神明豈

能比於符契且匹夫之績尚銘於鼎鼎況天子之孝不列於縑緇故欲昭宣示於中外垂芳於來葉光我國典也

遺詔

惟天鑒下享年有期惟人奉天獲沒爲善予嗣承丕業敬守宗祧中暉愴人幾淪大寶賴皇帝撥亂反正戡難濟時幸以暮年復茲安養常懼有悔以羞先靈今病旣彌留殆將不寤其國務之事非予所圖哀制之間茲審遺訓者皇帝不務疑厥疾未瘳禮貴適時或無封疑執宜令天下吏人令到出臨三日皆釋服無禁婚娶祠祀飲酒音樂其殿

中當臨者曉夕各十五舉音禮畢而罷皇帝宜三日而聽
政十三日小祥二十五日大祥二十七日而釋服以日易
月固有前聞人子之念皆所未忍而艱難之際萬國事殷
其葬送之儀尤須儉省特宜裁改無守常規嗚呼萬方勿
乖予志

受禪告南郊文

皇帝臣某敢以元牡昭告於皇皇上帝上皇厭理萬幾凝
情太古釋茲重責

文粹
作負

與道優遊宇宙不可以無君宗社

不可以無主恭惟歷數猥當虛薄懼忝帝位固辭不免遂

膺大禮以馭下人敬擇元日告類上帝惟神敷祐四海永綏天極

聖祖大道元元皇帝加號冊文

維天寶八載歲次己丑閏六月癸亥朔四日景寅曾孫嗣
皇帝臣隆基奉冊大聖高祖元元皇帝臣聞有萬物者必
本乎大道稱謂所極乃強名焉通三才者必存乎大寶敬
教所底唯崇號焉伏惟象帝啟元猶龍表聖應代降跡立
言垂範沖用之功覆幬於天地救濟之德亭毒於生靈安
裕邦家克保丕業顧以眇躬纘承丕緒永惟孚佑以致太

和頃者玉芝再產上記陰隲是用恭膺景命肅事鴻名旣刻元辰薦彰佳貺則有卿雲散彩瑞日重輪欽承降鑒載深兢惕謹上加尊號曰聖祖大道元元皇帝伏惟昭膺盛典永貽休烈

高祖神堯大聖皇帝加諡冊文

維天寶八載歲次己丑閏六月癸亥朔四日景寅孝曾孫嗣皇帝臣隆基敢昭告於高祖神堯皇帝伏惟乾坤合德厯數在躬俯順人心肇興王業濟生靈於塗炭宏至理於馨香四海樂推百蠻稽服故得圖應緯協開國造邦顧以

眇德績承丕績永惟孚祐以致太和頃者玉芝再產上記
陰隲欽承景命肅事鴻名既刻元辰薦彰嘉應則有卿雲
散彩瑞日重輪恭惟降鑒載深兢惕謹上加尊謚曰高祖
神堯大聖皇帝伏惟俯鑒虔誠昭升盛烈祇奉典冊伏增
感慰

太宗文武大聖皇帝加謚冊文

維天寶八載歲次己丑閏六月癸亥朔四日景寅孝曾孫
嗣皇帝臣隆基敢昭告於太宗文武皇帝伏惟英哲自天
應期撥亂翼戴元聖大拯橫流九服載安百蠻俾乂功冠

開闢德被生靈故干戈之動叶於湯武文章之盛懸於日月克昌大業永建皇圖顧以眇身祇膺寶命恭惟孚佑以至和平頃者玉芝再產上記陰騭是用欽承丕祉肅事鴻名既刻元辰薦彰嘉應則有卿雲散彩瑞日重輪永惟降鑒載深兢惕謹上加尊謚曰太宗文武大聖皇帝伏惟俯睠虔誠昭升盛烈祇奉典冊伏增感慰

高宗天皇大聖皇帝加謚冊文

維天寶八載歲次己丑閏六月癸亥朔四日景寅孝孫嗣皇帝臣隆基敢昭告於高宗天皇大帝伏惟繼文續聖嗣

武居尊保合太和緝熙庶績萬邦作乂百度惟貞興弔伐
之師展對崇之禮無有遠邇罔不率從仁風汪洋德澤滂
沛能事超於邃古休聲貫於列辟顧以眇德纘承丕緒永
惟孚佑以致太平頃者玉芝再產上記陰陽欽承景命肅
事鴻名旣刻元辰薦彰嘉應則有慶雲散彩瑞日重輪恭
惟降鑒載深兢惕謹上加尊諡曰高宗天皇大聖皇帝伏
惟鑒睦虔誠昭升盛烈祇奉典冊伏增感慰

中宗孝和大聖皇帝加諡冊文

維天寶八載歲次己丑閏六月癸亥朔四日景寅孝姪嗣

皇帝臣隆基敢昭告於中宗孝和皇帝伏惟睿聖日躋文
思天縱重昌大業光啟中興允昭嗣夏之功克荷纘堯之
緒武以靖亂文以經邦流愷悌之風布寬和之政故三靈
叶贊百姓與能庶績成康彝倫有穆顧以眇德纘承丕緒
永惟孚佑以致太和頃者玉芝再產上記陰騭欽承景命
肅事鴻名旣刻元辰薦彰嘉應則有慶雲散彩瑞日重輪
恭惟降鑒載深兢惕謹上加尊謚曰中宗孝和大聖皇帝
伏惟俯鑒虔誠昭升盛烈祇奉典冊伏深感慰

睿宗元真大聖皇帝加謚冊文

維天寶八載歲在己丑閏六月癸亥朔四日景寅孝子嗣
皇帝臣隆基敢昭告於睿宗大聖貞皇帝伏惟睿哲齊聖
文思光澤炳茲龍德潛躍應期靖難安人克昌休運臻於
至道惟懷永圖顧以眇身嗣膺寶命恭惟孚佑以致太和
頃者玉芝再產上記陰隲是用欽承景貺肅事鴻名旣刻
元辰薦彰嘉應則有慶雲散彩瑞日重輪恭惟降鑒載深
兢惕謹上加尊諡曰睿宗元真大聖皇帝伏惟俯睭虔誠
昭應盛烈祇奉典冊伏增感慰

光天文武大聖孝感皇帝加號冊文

維至德三載歲次己亥正月甲戌朔五日戊寅太上皇若
曰古之握乾符建皇極社稷不可無主帝王惟有攸歸則
堯禪舜舜禪禹畏天命也啓嗣禹武嗣文從人望也革命
易姓舉至公於國纂戎繼統用不私於親斯美大矣朕承
五聖之丕業宅萬國而爲君膺時撫運載將四紀夢帝與
齡實受多福曷嘗不虔恭至道亭育羣生早厭黃屋之勤
每懷紫霄之馭惟父知子我有元良惟君安人久思付託
皇帝天縱睿哲日躋孝敬率性之至通於神明財成之道
冠於宇宙朕徃以蕭牆之難克保宗社故先帝俾予以主

鬯頃者中原之禍期輯邦家我於是命爾以仗鉞當經綸
雲雷之際櫛沐風雨之時思契宿心累有成命而義不奉
詔謙不踰尊至於再三明茲懇讓洎即戎致討觀兵朔漠
驅馭豪傑用服乃功於明辟天亦集大命於爾躬推之至
公終陟元后夫名以制義器以昭德今羣公卿士咸旅於
庭明聽朕言敷厥成訓於戲奄有四海克康兆人光天之
業也經綸天地戡定禍亂文武之功也雄圖英算大聖也
保國安親孝感也今加徽號於皇帝曰光天文武大聖孝
感皇帝授傳國璽受命寶符各一上副於天中契於神下

叶於人三者朕無愧焉永保累聖之鴻緒對揚一人之休
命朕將訪道峒山追蹤汾水超然金闕之上終以玉京之
遊不其至哉良願畢矣宜令所司擇日即行冊禮

冊諡殤皇帝文

維開元二年歲次甲寅八月景辰朔日皇帝若曰於戲咨
爾襄王象月降靈自天生派弱不好弄長而勤書衣冠待
明有清河之畏慎狗馬不玩得淮南之恭儉往以中宗晏
駕嗣位登皇制於凶逆是膺虛器懼深禍亂闕爲掃除推
位太皇誠請懇到克遂雅懷宜其受茲多福享彼遐齡而

腠理俄纏膏肓不救感念親懿用隱悼於厥心夫避德與能傳聖永祚承萬方之大福在三讓之高節周之泰伯王則有焉豈可禮均藩臣名齊列國等昌邑之厭毒同營陽之淪棄者哉是用超於舊典享以榮號遠推仁慈之心特傷短折之壽可謚爲殤皇帝仍遣某乙持節授冊宜膺寵靈式慰泉壤嗚呼哀哉

冊謚讓皇帝文

維開元二十九年歲次辛巳十一月戊申朔二十五日壬申皇帝若曰於戲古者崇德考行猶謚大名飾終追遠亦

應徽冊況乃元昆之戚天倫之重豈循常典者哉咨爾故
太尉寧王憲純粹稟靈沖和成象孝友之性發乎天然仁
義之道彰乎日用加以好學不倦樂善有聞休問掩於間
平清猷光於魯衛實謂儀型邦家保乂藩維景命不融奄
從薨逝興言震動哀疚纏懷惟王地居元子合膺主鬯昔
朕上稟先訓克清羣凶遂固守撝謙懇讓儲副然則深仁
厚德茂行已表於生前寶位尊名盛禮寧忘於沒後是用
謚王爲讓皇帝今遣使尚書左丞相裴耀卿副使太常卿
韋紹等持節禮冊因心之感備物飾情瞻典策而哀深想

棣華而望絕所冀幽窆嘉茲寵榮

冊郢王爲皇太子文

維開元三年歲次乙卯正月甲申朔四日丁亥皇帝若曰
於戲書不云乎一人元良萬邦以貞易不云乎黃離元吉
得中道也將以守監從撫主器承祧執經陳東序之容端
冕見南郊之禮本支百代宜哉福祿咨爾郢王嗣謙忠肅
恭懿元亨利貞遵在鎬之惠慈稟生譙之祥應學能知道
孝乃因心書及春卿懸推早秀言窮叔譽遠愧生知當試
象之年備成人之敏九元贊命百姓與能正位少陽欽惟

大典是用命爾爲皇太子其在靖恭爾位聿修厥德詩書禮樂敦說爲本父子君臣威儀罔忒寢門問豎必視寒暄望苑招賢用資端直使三靈合契四海係心延我累聖之業積爾重輝之慶必敬必戒無怠無荒欽哉可不慎歟

冊惠莊太子文

維開元十二年十一月甲申皇帝若曰於戲夫縟禮所以飾情崇名所以表德義存追遠愛洽因親惟故司徒申王撝璿極稟靈邦家維翰體孝友以成性用淳和而合道沛獻受易率以鳴謙河間聚書時其好學加以出爲方伯宏

宣六條入登司徒大敷五教而天則不愆奄薨於行留邸
無期同輦遂遠興哀痛震動於厥心夫先王演親親之恩
春秋著加等之義上嗣之位飾終在期宜率茂典以永徽
猷魂而有靈式昭哀贈

冊惠文太子文

維開元十四年四月二十二日皇帝若曰嗚呼帝室之幹
曷降年不永天倫之戚而因心有加飾以徽章孔懷之義
也咨爾太子太傅上柱國岐王範孝友至性聰達多才樂
善爲詞言行俱敏好學流譽經傳悉通德旣訓於東宮化

且行於南國而輔仁或爽倚福無稽奄忽遷殂震悼何及
夫禮以情爲體欲增追遠之數行以名而尊是圖褒德之
軌故擇茲茂典崇以上嗣言念逝者用申友于今遣工部
尚書攝太尉盧從愿持節冊王爲惠文太子魂而有靈昭
是哀贈

冊忠王爲皇太子文

維開元二十六年歲次戊寅七月戊寅朔二日己卯皇帝
若曰於戲受天命者皇王之業大爲國本者儲副之位崇
所以上承宗祧下固黎獻咨爾開府儀同三司單于大都

護河東河北道行軍元帥朔方軍節度大使兼關內支度
營田鹽池押諸蕃部落等使上柱國忠王璵幼而夙成長
有宏量佩服仁義周旋禮樂忠孝極於君親友愛聞於兄
弟正以率下謙以持盈識洞於微智周於物通刑政之大
體備文武之殊能果於積德樂於爲善凡此數美常試皆
能豈矜知子之明諒曰至公之義況復仰稽天道俯察人
心立長則順天所助也議才則賢人之望焉是用命爾爲
皇太子往欽哉爾其敬膺典冊無忘戒慎思創業之艱難
知守器之爲重作貞萬國允協重明以揚烈祖之耿光永

金史卷一百一十一
貽後嗣之成式可不慎歟

冊交河公主文

維開元二十一年歲次癸酉四月丁酉朔十五日辛亥皇帝若曰於戲大邦爲好蕃服維寧豈獨元夫亦資良偶咨爾十姓可汗開府儀同三司濛池都護阿史那昕妻涼國夫人李氏柔懿成性幽閑表儀能修關雎之德克奉蘋蘩之禮自祗率輔佐肅恭言容載茂彤箴允諧內則是以崇寵蕃扞懷柔遠人將適遐荒更榮封邑是用冊爾爲交河公主爾其叶化蕃邦竭誠婦道膺茲寵命可不慎歟

冊建平公主文

維開元二十五年歲次丁丑九月十一日皇帝若曰於戲
修五禮者必本於天秩合二姓者將厚於人倫咨爾建平
公主秉質尚柔因心克順默識閭帷之教明徵圖史之言
黼藻四德笙簧六行河洲在詠將叶於好逮湯沐䟽封式
昭於備禮今遣使兵部尚書李林甫副使中書侍郎徐安
貞持節禮冊爾其受茲光寵慎乃威儀永保無疆之休且
爲將來之範可不慎歟

冊臨晉公主文

維開元二十六年歲次戊寅閏八月丁卯朔十六日壬午
皇帝若曰於戲古之帝女下嫁諸侯以正婚姻之懿綱昭
肅雍之令德咨爾臨晉公主蹈和成性體順爲心頗協生
知之敏更承師氏之訓柔明益著淑慎攸彰兼四教而不
違勤六行而無斁近日云吉嘉禮有期宜穆彝章載光冊
命今遣使侍中幽國公牛仙客副使黃門侍郎陳希烈持
節禮冊爾其克遵法度用廣徽猷發明閭德垂範於後可
不慎歟

冊眞陽公主文

維開元二十八年歲次庚辰二月戊子朔八日乙未皇帝
若曰闕德崇婦道也河洲之訓厚人倫也咨爾真陽公主
柔順因心幽閑表質雅著閨闈之則能瞻圖史之誠徽章
載茂淑範無違禮將及於有行寵宜循於賦邑今遣使兵
部尚書兼侍中牛仙客副使黃門侍郎陳希烈持節禮冊
爾其敬慎威儀無致失墜用膺寵命克保宜家可不慎歟

冊興信公主文

維開元二十九年歲次辛巳閏四月辛巳朔十八日戊戌
皇帝若曰於戲先王作則女子有行必開湯沐之封以成

肅雍之美咨爾興信公主自幼及長含和尚柔鑒圖史而
思齊勤組紉而無斁能遵法度克茂幽閑教於公宮旣昭
雅訓歸於外館宜穆彝章今遣使吏部尚書兼中書侍郎
徐安貞持節禮冊爾其益自修飾不忘誠慎俾昭淑問貽
永無窮可不慎歟

冊樂成公主文

維天寶五載歲次景戌七月辛亥朔二十二日壬申皇帝
若曰於戲三綱以正王化是先二姓之合人倫式敘下嫁
之禮厥惟舊章咨爾樂成公主毓質柔明稟性閑婉幼彰

惠問長有令儀教以公宮頗閱於圖史導以安則克勤於纂組瓊笄旣襲紺綬斯榮方諧卜鳳之期式叶從人之典今遣特進行尚書右僕射兼左相吏部尚書晉國公李林甫持節冊命往欽哉爾其祇率外禮虔恭中饋順而不違謙而不滿日新其德以正家人可不慎歟

冊壽光公主文

維天寶五載歲次景戌八月辛巳朔十三日癸巳皇帝若曰於戲家人以正易著乎辭女子有行詩載其義王化之本婦道攸先咨爾壽光公主敏質柔閑資性純粹芳衿內

穆淑問外宣能遵阿保之訓頗聞詩書之旨煒茲彤史既稟教於中闈襲以瓊笄斯待年於外館龜謀允叶鸞節方舒率是舊章式茲典禮今遣使光祿大夫行門下侍郎同中書門下平章事陳希烈副使中大夫給事中王壽持節禮冊往欽哉爾其祇勤敬德斧藻令儀履順居中以永終譽可不慎歟

冊平昌公主文

維天寶五載歲次景辰十二月戊申朔九日景辰皇帝若曰於戲婚姻之序人倫爲大家道以正王化乃貞咨爾平

昌公主性質閑婉襟靈敏悟柔順外徹和惠內融公宮道訓備聞勤儉之則女史箴規克慎言容之範頗闕圖象既習紃紼方修中饋之儀式從下嫁之禮屬車遵路晷度在庭歸爾好仇申茲寵典今遣使特進行尚書左僕射右相吏部尚書晉國公李林甫副使朝散大夫守中書舍人李暉持節冊往欽哉爾其虔修令德祇服厥訓循於法度宜爾室家可不慎歟

冊廣寧公主文

維天寶九載歲次庚寅四月己未朔二十六日甲申皇帝

若曰於戲本於王化正乃人倫始於國風彰於婦道咨爾
廣寧公主柔儀明婉淑性和惠端閑外肅敏悟內昭稟訓
公官法度彰於懿範受教師氏言容順於閭德頗聞圖史
能習組紉方遵下嫁之儀式備親迎之禮三星迨吉百兩
于歸申以徽章宏茲寵命今遣使特進行左相兼兵部尚
書崇元館大學士集賢院宏文館大學士上柱國潁川郡
開國公陳希烈副使正議大夫給事中權知刑部侍郎上
柱國渭源縣開國男李麟持節禮冊往欽哉爾其祗膺典
禮勤修內則宜爾室家叶於雍肅可不慎歟

追冊讓皇帝故妃元氏爲皇后文

維開元二十九年歲次辛巳十一月戊申朔二十五日壬申皇帝若曰於戲尊名備禮所以悲友于也恩親襲號所以申悼往也讓皇帝故妃元氏門承華烈代襲清猷柔範夙著徽音允穆自伉儷天人能修壺訓克茂詩箴之教載修圖史之文豈謂福善無徵遽先殂逝天倫有感追悼兼懷福貴從尊事資飾贈有行梁苑早膺藩幼疑之榮將祔壽原允叶椒房之位是用冊妃爲恭皇后今遣使尚書左丞相裴耀卿副使韋縚持節禮冊章服式陳典韋攸備永

惟神格嘉是哀榮

冊壽王楊妃文

維開元二十三年歲次乙亥十二月壬子朔二十四日乙亥皇帝若曰於戲樹屏崇化必正閭闈紀德協規允資懿哲爾河南府士曹參軍楊元璩長女公輔之門清白流慶誕鍾粹美含章秀出固能徽範夙成柔明自遠修明內湛淑問外昭是以選極名家儷茲藩國式光典冊俾叶龜謀今遣使戶部尚書同中書門下李林甫副使黃門侍郎陳希烈持節冊爾爲壽王妃爾其敬宣婦道無忘姆訓率由

孝敬永固家邦可不慎歟

冊榮王鄭妃文

維開元二十三年歲次乙亥十二月壬子朔二十七日戊寅皇帝若曰於戲作配藩維以正風訓莫不明慎聘納聿求儀範咨爾前相州鄴縣令鄭博古第二女素聞淑哲自稟幽閑習玩不華圖史成則宜其發祥茂族高選當代俾因邦媛之求式敘閭闈之化今遣使侍中裴耀卿副使吏部侍郎席豫持節冊爾爲榮王妃爾其勉茲孝敬誠彼滿盈祗率大猷永膺寵數可不慎歟

冊永王侯莫陳妃文

維開元二十六年歲次戊寅正月庚午朔十八日丁亥皇
帝若曰於戲燕翼之樹實屬於維城婚姻之禮必求於宜
室咨爾右羽林軍長侯莫陳超第五女天資清懿性與賢
明衣冠之緒克稟於閭德環珮之容備詳於閨訓是賴尚
柔之質以宏樂善之心宜配藩維用膺典冊今遣使金紫
光祿大夫兵部尚書兼中書令集賢院學士修國史上柱
國晉國公李林甫副使中大夫中書侍郎集賢院學士上
柱國徐安貞持節冊爾爲永王妃爾其虔恭所職淑慎其

儀惟德是修以承休命可不慎歟

冊榮王薛妃文

維開元二十九年歲次辛巳三月壬午朔十八日己亥皇帝若曰於戲古人大猷諒在婚禮必資令淑以儷藩維咨爾京兆府新豐縣令薛獻長女地承華族門傳雅範本幽閑之性爲禮教所成循圖覽史蹈和履順固可歸於邸第穆彼嬪風是用命爾爲榮王妃今遣兵部尚書兼侍中牛仙客副使黃門侍郎陳希烈持節禮冊爾其敬佩前規克勤內則式瞻清懿垂美無窮可不慎歟

冊濟王崔妃文

維開元二十九年歲次辛巳五月庚戌朔十四日癸亥皇
帝若曰於戲乃騰藩王旣開邸第必求士女以昭閭則咨
爾故絳州司士參軍崔承寵長女家承茂族代襲清和自
幼及長素有柔和之性監圖循史夙懋幽閑之德徽猷益
著淑問可嘉是以膺茲寵章主彼中饋是用命爾爲濟王
妃今遣使兵部尚書兼侍中牛仙客副使黃門侍郎陳希
烈持節禮冊爾其敬佩箴訓克慎威儀輔我維城永崇盤
石可不慎歟

冊信王盧妃文

維天寶二年歲次癸未七月戊戌朔二十一日戊午皇帝
若曰於戲建邦爲屏必勉於閭教嘉耦曰妃是賴於嬪則
咨爾前殿中省尚書輦局直長盧季融第三女淑德賢明
令儀柔順含和自整備詳環珮之容稟訓有方更出衣冠
之族實資女範作配藩維是用命爾爲信王妃今遣使尚
書右僕射兼右相晉國公李林甫副使銀青光祿大夫行
中書侍郎徐安貞持節禮冊爾其肅穆閨闈虔恭禮度克
終婦道以正國風可不慎歟

冊陳王韋妃文

維天寶四載歲次乙酉三月己未朔十九日丁丑皇帝若
曰於戲咨爾京兆府新豐縣尉韋釜第八女慶承華族禮
冠女師欽若保訓踐修德範遵圖鑒史操尚幽閑內則嬪
儀道彰柔順陰教之美國風攸屬允資邦媛作配藩闈是
用命爾爲陳王妃今遣使尚書左僕射兼右相吏部尚書
修國史晉國公李林甫副使中書舍人兼判刑部侍郎孫
逖持節禮冊其率循懿行懋昭令德祇膺典冊可不慎歟
冊壽王韋妃文

維天寶四載歲次乙酉七月丁卯朔二十六日壬辰皇帝
若曰於戲古之建封式崇垣翰永言配德必擇幽閑咨爾
左衛勲二府右郎將韋昭訓第三女育慶高門稟柔中閭
動修法度居玩琴瑟夙聞師氏之學素習公宮之禮聿求
貞懿作儷藩維爰資輔佐之德以成樂善之美是用命爾
爲壽王妃今遣使光祿大夫行左相兼兵部尚書宏文館
學士李適之副使金紫光祿大夫行門下侍郎集賢院學
士兼崇文館大學士陳希烈持節禮冊爾其欽承寵數率
由令則敬恭婦道可不慎歟

冊廣平郡王崔妃文

維天寶五載歲次景戌四月癸未朔十六日戊戌皇帝若
曰於戲朱邱傳封爰求嘉耦瓊笄作合必擇華宗咨爾太
子宮門郎崔珣長女胄自軒冕訓承圖記柔閑內正淑問
外宣旣連榮於姻戚且襲吉於龜筮是用命爾爲廣平郡
王妃今遣使光祿大夫行門下侍郎陳希烈持節禮冊爾
其虔奉儀則祇膺典禮克昌祚允永固宗祧可不慎歟

冊涼王張妃文

維天寶九載歲次庚寅四月己未朔十七日乙亥皇帝若

曰於戲內則之禮用穆人倫中饋之義以正家道咨爾左
衛率府親府左郎將羅國公張安仁第二女門承軒冕族
著清華蕙德柔明蘭儀婉茂早習組紉之藝克聞圖史之
規懿範聿修四德斯備虔恭蘋藻之訓式彰珩璜之容作
儷英藩允資令淑今遣開府儀同三司行尚書左僕射兼
右相吏部尚書崇文館大學士監修國史上柱國晉國公
李林甫副使中大夫行中書舍人權知禮部侍郎事上柱
國成紀縣開國男李暉持節冊爾爲涼王妃爾其祗膺典
禮永綏寵命可不慎歟

冊東海神爲廣德王文

維天寶十載歲次辛卯三月甲申朔十七日庚子皇帝若
曰於戲四瀛宅日百谷稱王望祀之禮雖申崇名之典猶
缺惟東海浴日浮天納來宏往善利萬物以宗以都朕嗣
守睿圖式存精享神心允穆每叶休徵今五運惟新百靈
咸秩思崇封建以展虔誠是用封神爲廣德王其光膺典
冊保乂寰宇永清坤載敷佑邦家可不美歟

此文下有惟南海蕩滌炎

州包括溟漲涵育庶類以成厥德惟西海汜濫疏名清晏表德成茲潤澤奠彼金方惟北海限蠻阻夷實資坎德含奇蘊粹實曰天池似非一篇

今從唐大詔令附註篇末

欽定全唐文卷三十九目錄

元宗 二十

冊勃律國王文

冊疏勒國王裴安定文

冊于闐王尉遲伏師文

冊箇失密國王木多筆文

冊渤海郡王大欽茂文

冊順義王莫賀咄吐屯文

冊突厥苾伽骨咄祿爲可汗文

冊小勃律國王麻來兮文

冊突騎施大纛官都摩度闕頡斤文

冊陀拔薩憚國王爲恭化王文

冊突騎施伊里底密施骨咄祿毗伽爲十姓可汗

文

冊罽賓國王勃匐準文

冊十姓突騎施移撥可汗文

冊竭帥國王素迦文

冊骨咄國王羅金節爲葉護文

冊突騎施黑姓可汗文

冊骨咄祿三姓毗方伽頡利發文

賜三姓葉護都摩度闕頡斤鐵券文

賜護密國王子頡吉里匐鐵券文

賜突騎施黑姓可汗鐵券文

賜故石國王男那俱車鼻施進封懷化王并鐵券

文

謁陵大赦文

改元大赦文

加應道尊號大赦文

欽定全唐文卷三十九

元宗 二十

冊勃律國王文

維開元五年歲次丁巳五月庚子朔二十七日景寅皇帝
若曰於戲夫象賢種德匪直諸華開國承家無隔殊俗咨
爾勃律國王蘇弗舍利支離泥卿歷代酋渠執心忠肅遙
申誠款克修職貢謝知信由其遠略郭虔瓘所以足兵行
觀郁成授首何止匈奴斷臂是用命爾爲勃律國王爾宜
善始令終長奉正朔寧人保國慶及苗裔往欽哉其光膺

金史卷之三
第三十一
典冊祗朕寵命可不慎歟

冊䟽勒國王裴安定文

維開元十六年歲次戊辰正月戊戌朔十四日辛亥皇帝
若曰萬邦述職無隔華夷五等䟽封式固藩屏咨爾䟽勒
阿摩支知王事左武衛將軍員外置裴安定誕靈蒲海稟
秀葱山蘊義以立名蹈仁而成德雖日月所炤莫非王土
而烽燧時警猶曰虜庭遂能扞彼邊陲歸我聲教載闡疇
庸之義俾宏利建之風今遣大理正攝鴻臚少卿喬夢松
冊爾爲䟽勒王於戲允迪由庚勿替敬典綏厥戎落永爲

漢藩爾往欽哉

冊于闐王尉遲伏師文

踐義立身資忠成性稟崆峒之氣威武可稱慕函夏之風
款誠必盡功著沙漠聲聞闕庭宜有褒崇俾膺封建今遣
大理正攝鴻臚少卿喬夢松冊爾爲于闐王於戲祇若順
訓聿修令德無怠無荒以保土宇爾往欽哉

冊箇失密國王木多筆文

維開元二十一年歲次癸酉四月丁酉朔五日辛丑皇帝
若曰咨爾箇失密國王木多筆於戲奕葉歸順遠舒誠節

修職貢之禮受蕃落之寄時有代謝兄亡弟襲保界山川
輯率黎庶國有制度俗尚清淨可不勉歟今命爾爲箇失
密國王恭膺冊命往欽哉

冊渤海郡王大欽茂文

於戲王者宅中守在海外必立藩長以寧遐荒咨爾故渤
海郡王嫡子大欽茂代承緒業早聞才幹昔在爾考忠於
國家爰逮爾躬當茲負荷豈惟立嫡亦乃擇賢休問可嘉
寵章宜及是用命爾爲渤海郡王爾往欽哉永爲藩屏長
保忠信效節本朝作範殊俗可不美歟

冊順義王莫賀咄吐屯文

維開元二十八年歲次庚辰三月丁亥朔二十二日戊申
皇帝若曰於戲茂秩攸升疏封有命寵榮斯及必在英賢
咨爾石國王莫賀咄吐屯代襲誠節器標果斷盡忠向化
作扞蕃陲頃以蘇祿殘妖尚爲邊患乃能納其鄰國授以
良圖候彼疆場相爲表裏致令克清邊徼遠輯殊方實賴
心膂載宣勲力靜言褒異非爾而誰是用冊爾爲順義王
爾宜敬慎王猷撫寧部衆永保藩輔可不慎歟

冊突厥苾伽骨咄祿爲可汗文

維開元二十八年歲次庚辰三月丁亥朔二十六日壬子
皇帝若曰於戲乃瞻陰方代有君長至於膺我盛禮榮彼
殊鄰必擇其人諒無虛授咨爾突厥苾伽骨咄祿可汗氣
稟崆峒材雄朔漠見事無惑執心不渝迄先代以來結好
中國自續承舊業克繼前修遠遣使臣來朝闕下義之所
感情實嘉焉不有褒稱孰彰忠順是用冊爾爲可汗今遣
從弟右金吾衛將軍質持節禮冊往欽哉可汗其丕承徽
章益勵名節永保多福以貽後昆可不慎歟

冊小勃律國王麻來兮文

於戲王澤無偏義宏於遠邇朝榮所厚諒敦於款誠咨爾
麻來兮代襲君長家傳忠信地雖限於絕域心每歸於本
朝爰逮爾躬足繼前緒素有馭下之略益堅奉上之心是
用冊爾爲勃律國王爾其敬膺典冊無忘節義永保土宇
以貽子孫可不慎歟

冊突騎施大纛官都摩度闕頡斤文

維天寶元年歲次壬午六月甲戌朔二十二日乙未皇帝
詔曰於戲王者無外不隔遐方必揆忠款是加寵命咨爾
骨咄祿毗伽都摩度闕頡斤代襲榮望名擅驍騎信義有

聞部衆稱美往在蕃任受制兇威元惡已除能革心而向化牙纛旣立克輔主以懷歸嘉爾誠心載崇賞秩是用命爾爲三姓葉護往欽哉爾其祇奉典冊懋明忠順善翊君長勉樹勲庸可不慎歟

冊陁拔薩憚國王爲恭化王文

維天寶三年歲次甲申閏二月乙未朔二十二日景辰皇帝詔曰於戲王化所及禮在於懷柔藩部有歸義存於冊命咨爾陁拔薩憚國王阿魯施多志懷恭順深達智謀賓以使臣修其職貢信義昭著深可褒稱是用命爾爲恭化

王爾其祇奉典冊懋遵風教忠勤自勵始終無違用率於遐邦以宣我朝命可不慎歟

冊突騎施伊里底密施骨咄祿毗伽爲十姓可汗

文

維天寶三載歲次甲申六月癸巳朔十二日甲辰皇帝詔曰於戲覆燾之德豈隔於華夷綏懷之道實貴於忠順咨爾突騎施伊里底密施骨咄祿毗伽承其宗緒達於智謀能和衆心以致寧靜載執蕃禮遠效懇誠節義昭明深可嘉尚是用命爾爲十姓可汗往欽哉爾其懋膺典冊祇奉

朝化蹈此忠信保於始終用主於遠方以光其寵命可不
慎歟

冊罽賓國王勃劄準文

維天寶四載歲次乙酉九月乙卯朔二十二日景子皇帝
詔曰於戲遠方恭順褒錫宜優累代忠勤寵章斯及咨爾
罽賓國王男勃劄準宿承信義早竭款誠寧彼下人二蕃
安靜繼其舊業萬里來朝秉節不踰懇懷彌著愿情之至
深可嘉焉是用冊命襲罽賓國王及烏菟國王仍授右驍
衛將軍往欽哉爾其肅恭典冊保尚忠義承膺於寵命以

率於遐蕃可不慎歟

冊十姓突騎施移撥可汗文

爵以酬庸德以懷遠乃建蕃國抑惟舊章十姓突騎施移
撥可汗骨咄祿毗伽俱支効款輸誠志稱勇烈克保忠貞
之節且兼射御之能信義無愆邊隅是賴加以不從惡黨
遠慕華風言念爾勞載懷嘉尚眷茲部伍必仗材雄宜式
拜於寵命俾有膺於殊禮可冊爲十姓突騎施移撥可汗

冊竭帥國王素迦文

於戲賞勞之制必崇名器懷柔之典無替疇庸咨爾竭帥

國王勃特沒兄素迦代竭忠誠僻居遐裔夙懷智識早聞
勇義頃以勃特沒於鄉不孝於國不忠而卿報屈既深久
被淪棄今惡黨已殄兇徒就擒卿遂能輸忠赤於朝廷表
仁惠於蕃部永言効節宜膺旌賞是用冊爾爲竭帥國王
爾其丕荷國恩克修蕃禮子孫萬代長保寵榮豈不美歟
可不慎歟

冊骨咄國王羅金節爲葉護文

維天寶十一載歲次壬辰正月己卯朔二十四日壬寅皇
帝詔曰於戲疇賞懋功無隔於中外懷荒卹遠諒歸於典

謨咨爾骨咄國王羅金節夙遵聲教志尚忠節作扞邊疆
勤效斯著頃者以羣醜撥動方欲脅從而忠懇不渝始終
彌固言念於此嘉尚良深是用授爾驃騎大將軍仍冊爲
葉護爾其祗膺典禮慎守封疆貽慶子孫受茲寵錫可不
美歟

冊突騎施黑姓可汗文

維天寶十二載歲次癸巳九月己亥朔六日甲辰皇帝若
曰咨爾骨咄祿毗伽突騎施黑姓可汗特進登里伊羅密
施立國惟信表賢在忠旣效信以推誠亦旌忠而懋賞卿

才略備舉知勇兼資強足抗敵威能率下故得甲兵孚訓
族類懷仁旣嚮順以移風亦事大而知禮是用載加榮秩
式崇錫命今授卿特進爲突騎施可汗卿敬勉良圖光昭
盛典保我疆場惡我寇讎俾業固山河福綏種落永私恩
寵可不慎歟

冊骨咄祿三姓毗方伽頡利發文

維天寶十二載歲次癸巳九月己亥朔六日甲辰皇帝若
曰咨爾骨咄祿伊難如三姓毗方伽頡利發夫崇德報功
帝王之事講信修睦人臣之禮卿久佐藩部備吏戎落知

荐居不可以早賓朝北蕃之俗不能自理遠仗皇威深悟
變通克知成敗豈惟款塞之懇常有捍邊之心言念披誠
有增嘉歎今授卿左羽林軍大將軍員外置同正員兼賜
冊書鐵券永執蕃禮無替華風克終令名常保祿位可不
慎歟

賜三姓葉護都摩度闕頡斤鐵券文

於戲善於國者賞必加焉自古哲王率由斯道咨爾三姓
葉護左羽林軍大將軍員外置同正員骨咄祿毗伽都摩
度闕頡斤素稱驍悍兼蘊智謀當蘇祿之時雖力有所闕

而懇誠之至乃朕則知元惡旣除效勤彌亮果能率衆相
歸降斯盡節於朝廷且立功於疆場信義若此嘉尚良深
是用授卿寵章榮彼蕃部今賜卿丹書鐵券傳之子孫永
固河山有如日月可不慎歟

賜護密國王子頡吉里匐鐵券文

咨爾護密王子頡吉里匐夫藩扞所寄惟信是從節義可
稱雖遠弗隔卿之先代嘗附國朝通使有常書譯相次自
卿父繼立近阻強鄰被制凶威有乖夙志今遂能獻誠款
潛託歸懷自非心悟遠圖何以克存先意念此誠懇嘉尚

尤深今賜卿丹書鐵券以旌忠孝長表信義永傳子孫日月同明山河齊久可不美歟可不慎歟

賜突騎施黑姓可汗鐵券文

維天寶十二載歲次癸巳九月己亥朔六日甲辰皇帝若曰咨爾骨咄祿毗伽突騎施黑姓可汗登里伊羅密施惟皇建極聲教及於遐荒惟帝念功禮命加於恭順卿雖擁在沙漠常扞烟塵識進退存亡之端知古今成敗之數久率藩部歸化朝廷兼拒兇闕挫其侵軼精貫白日義光青史績用累著嘉尚良深今授卿特進冊爲突騎施可汗重

爵貴號以崇其寵丹書鐵券以表其忠宜保始終永固誠節山河帶礪福祿長存可不慎歟

賜故石國王男那俱車鼻施進封懷化王并鐵券

文

維天寶十二載歲次癸巳十月戊辰朔十四日辛巳皇帝若曰咨爾故石國順義王男那俱車鼻施夫柔遠之道必先文德錄誠之美是加命禮卿之先代累賓朝化列在藩王卿又能效節輸忠克復居宇扞邊率下循職修貢信彰夷落義貫幽明言念懇誠良多嘉尚今授卿特進仍封懷

化王并賜丹書鐵券以表忠赤宜執於恭順保於終始每資犄角之用永固山河之寵可不美歟

謁陵大赦文

祀之大者莫尊於嚴享德之至者莫加於孝敬故周廟頌思文之章漢陵躬展事之禮因心斯在敢不肅祇我國家應天受期駿惠丕命繼武宗文之德重熙累洽之盛故以道高系表首冠帝先朕以眇身獲保鴻業往屬多難時逢國屯推戴神宗纂復興運允迪前烈載康兆人此蓋仗卿士之謀叶人祇之贊豈伊薄德敢承天庥露往霜來久積

園陵之思秋嘗夏禘聿思孝饗之誠乃夏朔辰祥芝產於
太室及秋吉日珍木瑞於神宮對越上靈拜茲嘉貺頃以
秋稼未實民役尚勞每事害農豈惟在予有咎之責因親
設教恐違先旨恤隱之方今三時已和百禮斯洽崇牙宿
設萬舞在庭敬爾臣工駿奔執豆蠲潔爲禧明德惟馨有
來雍雍載懷怵惕之思至止肅肅如聞歎息之聲降格有
終纏感罔極瞻弓劒而莫及捧鏡奩而哽咽始自橋嶽終
奉梁山紫氣外於壽宮甘露遍於陵樹白兔馴擾瑞草呈
祥恭惟昭陵載感王業肆台小子夙奉睿圖及齋戒虔誠

率祇祀典聖容昭見靈迹尤彰每四方多虞中國有事雖
升龍已遠而躍馬如神及配奠壽宮親聞抃躍幽明合慶
今古未聞蓋皇天眷於我唐神心昌於後嗣延祚之祉豈
獨在予一人錫類之恩宜廣覃於四海可大赦天下自開
元十七年十一月二十二日昧爽已前大辟罪已下罪無
輕重已發覺未發覺已結正未結正繫囚見徒常赦所不
免者咸赦除之自先天已來有雜犯經移近處流人并配
隸磧西瓜州者朕捨其舊惡咸與惟新並宜放還其反逆
緣坐長流及城奴量移近處編附爲百姓左降官量移近

處官人有亡官失爵齒力未衰者量加收錄天下百姓無
出今年地稅之半如已徵納聽折來年逋租懸調在百姓
腹內者一切放免孝子順孫義夫節婦旌表門閭終身勿
事諸州侍老百歲已上賜帛十段九十已上賜五段八十
已上賜三段獻陵昭陵定陵官吏并管陵縣官各別加一
階陵戶並放從良終身灑掃陵寢仍每陵側近取百姓六
鄉以供陵寢永勿徭役自古帝王賢臣將相陵墓宜令所
在州縣致祭内外文武官三品已上加爵一等四品已下
各賜一階亞獻皇太子鴻賜物二千匹終獻慶王潭賜物

一千匹邠王守禮寧王憲薛王業各賜物八百匹忠王浚
棣王洽鄂王涓榮王滉光王滉等各賜物七百匹中書門
下賜物五百匹開府王毛仲賜物三百匹皇親五等已上
諸親三等已上及文武百寮各賜物有差自古明王因心
以待人曲已以施物故休戚共而憂樂同也中書門下丞
相尚書開府三省大將軍父並賜三品官九卿三監十二
衛監門羽林軍五省長官三府尹大都督長史父各贈四
品官五品已上清官父各贈五品官凡所贈官宜兼贈母
邑號俾夫羣臣受榮上延父母先帝遺澤下及幽冥興言

金定三月三日
及此良多感歎君臣一體榮辱是同龍蛇之歌古今作戒
其唐元年兩營立功官三品已上與一子官其四品已下
選日優與進改京兆府供頓縣免今年地稅諸道戰亡人
家仰州縣存恤不支濟者量事賑濟諸軍健兒別勅行人
各賜勲兩轉

改元大赦文

古先哲王之致理也皆上順天心下稽人事時令贊發生
之德靈符協紀年之稱考彼前載斯爲大猷恭惟烈祖元
元皇帝天寶錫慶象帝之先垂裕後人重光五聖自朕嗣

守丕業洎三十年實賴宗社降靈昊穹孚祐萬方無事六府惟修寰宇晏如庶臻於理然則乾元在上仁覆爲德皇王臨下惠化攸先思宏善貸用廣慈育遵道寶而建元暢元風於不宰況屬陽和布氣獻歲發生宜覃在宥之恩式降惟新之澤可大赦天下改開元三十年爲天寶元年正月一日昧爽已前大辟罪已下罪無輕重已發覺未發覺已結正未結正繫囚見徒常赦所不原者咸赦除之諸色左降官並流人未經量移者亦與量移陽春布和鳥獸孳育宜禁麋卵以遂生成自今已後每年春天下宜禁弋獵

如聞百姓之內或有人戶高丁多苟爲規避父母見在乃
別籍異居宜令州縣勘會其一家之中有十丁已上者放
兩丁征行賦役五丁已上者放一丁即令同籍共居以敦
風化天下侍老八十已上者宜委州縣官每加存問仍量
賜粟帛侍丁者令其養老孝假者矜其在喪比者王政優
容俾申情理而官吏不依令式多雜役使自今已後不得
更然國之急務莫若求才頃者數遣搜揚士庶尚慮遺逸
更宜精訪以副虛懷其前資及白身人中有儒學博通及
文詞秀逸或有軍謀越衆或有武藝絕倫者委所在長官

具以名薦若乃宏我風化實惟方岳必佇其人以膺共理
其京文武官五品已上清資並郎官據資厯人才堪爲刺
史者各任封狀自舉但文宣垂訓事必正名而黃鉞古來
以金爲飾金者應五行之數有肅殺之威去金稱黃理或
未當其黃鉞宜改爲金鉞副威武之義焉内外文武官九
品已上各賜勲兩轉前王重典在乎祭祀況屬惟新事宜
昭告五嶽四瀆名山大川諸靈迹及自古帝王忠臣義士
並令所繇州縣致祭

加應道尊號大赦文

惟天法道惟后奉天既合德以降符必執象以明本則上
元眷命有以丕承大寶鴻名斯爲公義朕續宗社之重揚
文武之烈克勤匪懈服道齊心允迪元猷聿求至理日慎
一日三紀於茲矣區夏大寧靈祇集貺而公卿宗子耆艾
法流僉曰玉芝白魚神言瑞景天之應也敦信興禮務本
崇儒人之應也化洽而風俗還淳氣和而疵癘不作天啟
道運其何讓焉上答元符願增徽號披誠詣闕累上封章
摯請愈勤懇詞難奪以今日敬膺典冊曰開元天寶聖文
神武應道皇帝式副人神感懼交集宜廣恩於善貸俾協

慶於惟新可大赦天下自天寶七載五月三十日昧爽已前大辟罪已下罪無輕重已發覺未發覺已結正未結正繫囚見徒當赦除之其左降官及流移配隸安置罰鎮效力之數並稍與量移亡官失爵放歸不齒及諸色被停與替非衰老疾病者宜令所司量加收敘人和年登休運斯屬輕徭省賦惠政攸先將洽小康必宏厚貸其天下百姓來載租庸並宜放免及諸色勾徵等亦一切放免自古帝王建邦受命必敬先代以循舊章周備禮文既存三恪之位漢從損益唯立二王之後自茲已降且復因循將廣繼

絕之恩宏復古之道宜於後魏子孫中簡擇譜屬灼然相承者一人委所司勘責準鄴公例定爲三恪陵廟所奉典職惟崇事雖更於有司任豈循於常秩其宗正卿宜與大常卿同品其少卿及丞亦宜準此又上古之君存諸號氏雖事先書契而道著皇王緬懷厥初寧忘咸秩其三皇已前帝王宜於京城共置一廟仍與三皇五帝廟相近以時致祭自古受命之主創業之君皆經濟艱難戡定禍亂雖道謝於往古乃功施於生人用率典章亦從禋祀其歷代帝王肇迹之處未有祠宇者宜令所繇郡縣量置一廟以

時享祭仍取當時將相德業可稱者二人配祭仍並圖畫立像如先有祠宇霑享祭者亦宜準此式間表墓追賢紀善事有勸於當時義無隔於異代其忠臣義士孝婦烈女史籍所載德行彌高者所在亦置一祠宇量事致祭古者鄉有塾黨有庠所以明尊卑之義正長幼之序風化之道義在於茲先置鄉學務令敦勸如聞郡縣之間不時訓誘閭巷之內多虧禮節致使言詞鄙褻少長相凌有黷清猷何成雅俗自今已後宜令郡縣長官申明條式切加訓導如有禮義興行及紀綱不立者委採訪使明爲褒貶具狀

聞奏道教之設淳化之源必在宏闡以敦風俗頃列四經之科將冠九流之首雖及門求進頗有其人而覩奧窮微罕聞達者豈專精難就爲勸獎未宏天下諸色人等有通道德經及南華等四經任於所在自舉各委長官考試申送其崇元館生自今已後每至選日宜減於常例次爲留放朕每以道元有屬思竭精誠經教所在豈忘崇奉且宗其道者師其人行其教者尊其禮晉琅琊王公府舍人楊真人護軍長史許真人丹陽上計掾許真人皆道著妙門感通元闕降高真之迹爲上清之宗後漢張天師教達元

和德宗太上正一之道幽贊生靈梁中散大夫貞白陶先生高尚塵表博達元微綜輯真經傳授後學並令有司審定子孫將有封植以隆真嗣天師冊爲太師貞白冊贈太保其洞宮山各置壇祠宇每處度道士五人並取近山三十戶蠲免租稅差科永供灑掃諸郡有自古得道昇仙之處雖先令醮祭循慮未周宜每處度道士二人其靈迹殊尤功應遠大者度三人永修香火其茅山紫陽觀取側近二百戶太平崇元二觀各一百戶並蠲免租稅差科長充修葺灑掃應天下靈山仙迹並宜禁斷樵採弋獵如聞山

林學道之士每被搜括且法之防邪本有所以至於宿宵妖訛亡命聚衆誘陷愚人故令禁斷郡縣遂一槩迫逐使志道之士不得安居自今已後審係清潔更不得恐動以廢修行其五嶽四瀆名山大川各令本郡長官致祭朕刻意真經虔誠至道冀憑元祐永錫黔黎每朝禮三清則宵衣忘寢或齋戒一室則蔬食精專不以勤躬爲倦務以徇物爲心況於宰殺尤加惻隱自今已後每月十齋日不得輒有宰殺又閭閻之間例有私社皆殺生命以資宴集仁者之心有所不忍永宜禁斷且因親設教式本於人倫自

葉流根必逮於榮養内外文武職掌官有五品已上其父
祖見在無官者宜各授一官仍令致仕其祖母見在準母
例處分京官五品已下正員如父母已沒未有官者宜追
贈所司勘會即與處分睦親之義因心不忘前開府儀同
三司竇瑰頃以容納微人頗虧憲典永懷舅氏追感渭陽
宜申國恩再復榮秩可開府儀同三司仍放優閑不須朝
會王澤無私豈殊於中外天瑞有慶頻屬於京輦寬大之
典則以博覃施惠之恩特申曲被其京城父老宜各賜物
十段七十已上仍版授本縣令其妻版授縣君六十已上

版授本縣丞天下侍老百歲已上版授下郡太守婦人版授郡君九十已上版授上郡司馬婦人版授縣君八十已上版授縣令婦人版授鄉君仍並即量賜酒麪內外見任文武官九品已上宜各賜勲兩轉其京文武官見在京及致仕並陪位官諸方通表使及月番官等一品賜物一百匹二品三品八十匹四品五品五十匹六品七品三十匹八品九品二十匹兩京留守各八十匹其節度採訪使並諸充官使未回者並同在京例賜物貴妃楊氏稟性柔和因心忠孝克慎閨壺蹈禮循詩加以勤志元宗協誠嚴奉

率勵宮掖以迪關雎宜賜物三千匹嬪御等賜物有差其
太真觀雖先度人住持尚少宜更度道士七人太子璵宜
更賜物二千匹慶王琮已下各賜物有差率土之內賜酺
三日